



Югъан язгъан экинчи кагъыз

Югъан бу кысгъаракъ кагъызында иманлыланы ялгъан уйретиwлеге бакъгъан якъда сакъ турмагъа чакъыра. Иманлыланы алдында токътагъан масъалалар элчи биринчи кагъызында озълени гъакъында язгъанларына ошашлы геле болгъан буса ярай. Шо саялы да мунда Исагъа иман салгъанлар учун аслу болуп Ким токътайгъанлыкъгъа, демек Аллагъны Инсан болгъан Уланы Месигге дагъы да артыкъ тергев бакъдырылып сэйлене.

1 ¹Аллагъ сайлагъан ханымгъа ва ону яшларына* мен ёлбашчыдан салам! Мен сизин гъакъ герти кюйде сюемен. Янгыз мен тююл, гъакъ гертиликни билегенлер барысы да сизин сюелер, ²неге тююл гъакъ гертилик бизин ичибизде яшай ва даим де бизин булан къалажакъ.

³Атабыз Аллагъдан ва Ону Уланы Иса Месигден гелеген зор яхшылыкъ, рагъму ва паракъатлыкъ гъакъ гертиликде ва сюювде бизин булан къалажакъ.

⁴Сени бир-бир авлетлеринг бизге Атабыз буюргъан кюйде гъакъ гертиликни ёлу булан юрюйгенин эшитгенде, мен бек сююндюм. ⁵Энни де сагъа тилеймен, гъюрметли ханым, гелигиз, барыбыз да бир-бирибизни сюейик! Бу мен сагъа язагъаным янгы бир буйрукъ тююл, башдан берли де бизге берилген буйрукъ. ⁶Сюймек демек буса биз Аллагъны буйрукъларына гёре яшамагъа герекибиз демекдир. Башдан берли эшитгенигиз йимик, Ону буйругъу сюювню ёлунда юрюмеклигибиздир.

⁷Дюньяны гъар еринде Иса Месигъ ер юзюне инсан къаркъарада гелгенин къабул этмейген бир кёп ялгъанчылар яйылгъан. Шолай адамлар – ялгъанчылар ва Месигъни душманлары. Месигге амин болугъуз

⁸Озьююзге тергев беригиз! Тёкген къыйыныбыз пучуна гетмесни гъайын этигиз, амма тийишли гъагъыгъызыны алмагъа къаст этигиз.

* 1:1 *Ханым ва ону яшлары* – мунда Исагъа иман салгъанланы жыйыны ва шо жыйынны ортакъчылары.

⁹Месигъ уйретеген ёлдан тайып, Огъар амин болмайгъан гъар кимни Аллагъы ёкъдур. Шо ёлгъа амин болгъан кююнде къалгъан гъар кимни буса Атасы ва Уланы бар. ¹⁰Эгер ким буса да бирев, сени янынга гелип, Иса уйретеген ёлну гёрсетмей буса, ону уюнге гирме де къойма, огъар салам да берме. ¹¹Неге тююл де, шолай адамгъа салам береген гиши ону яман ишлерини ортакъчысы да болур.

¹²Сизге язмагъа мени дагъы да кёп затларым бар эди, амма кагъызгъа язмагъа сюймеймен. Сююнчююз толу болсун учун, бир сизин яныгъызгъа гелмеге ва сизин булан бетге-бет сэйлемеге умут эмемен.

¹³Аллагъ сайлагъан къызардашынгны яшлары да сагъа салам йиберелер.